

## E Smartfon iss gons prackdisch

Vor e paar Daach hott misch de Schorsch oogerufe unn gefroochd: Honnes, host du eischendlich su e Smartfon?

Isch habb ins Telefon gegrinsd. Ei Schorsch, du werrstder doch nitt su e Ding ooschaffe wolle?

Doo seet de Schorsch: Wie kimmsden doo druff?

Isch saach: Ei weilde misch nooch emm Smartfon gefroochd host, also hossde enn Grund dezu. Awwer ja, isch habb oons.

De Schorsch druff: Honnes, waaßde, die gons Redderei im Fernseh weesche su emm digidale Impfpäss gieht onn mir unn omm Kättche vorbei, weil doodeferr duts su e oofach Händy nimmi, wie isch oons habb. Moin Bub hott gesaad, ferr su enn Impfpäss misst isch e Smartfon hawwe, weesche su emm Kod.

Ach Schorsch, saach isch, loss dich nitt verriggd mache, aach nitt vunn doim Bub. Ihr zwaa seid doch schunn zwaamol geimpft, odder?

Nodierlich, seet de Schorsch, unn dess Impfe iss in unser Impfpäss oigetraache worrn.

Isch druff: No siehde, dess dut erst emol lange. Irschendwonn werdd merr emol heern odder lese kenne, wo merr Impfnoochweise mett Ku-Err-Kod krieh konn unn ...

De Schorsch hott misch unnerbroche: Was issen dess eischendlich ferrn Kod? Sinn dess die viereckische Zeichnung mett dene ville kreiz unn quere Strich druff?

Isch gebb ze Antwort: Ja, genau die. Wennerr donn emol su Noochweise habbt duder onn de Stell vunn de Impfpäss die doohie mett numme, wo su Noochweise notwennisch sinn. Zum Beispill brauchde die Babiern wennde, saache merr mol, in e Wertschafft odder in e Museum gieh willst.

Warum donn su Noochweise?, frächt de Schorsch, was issen dess ferrn Umstond? Mir kennde doch weider unser Impfpäss vorzeische unn doo kennde die vunn de Wertschafft odder vumm Museum druffgugge, odder?

Isch saach: Schorsch, dess isses joo, dess Druffgugge. Wer doo onn de Dier stieht unn uffbasse dut, dass nor Geimpfte eroi kumme, will nitt uff enn Impfpäss gugge, naa, der will de Noochweis seh, weil dort iss enn Ku-Err-Kod druff. De Uffbasser hält also nor soi Smartfon uff de Kod unn schunn siehder, dassde geimpft bist unn aach ob de oomol odder zwaa mol geimpft bist unn mett was ferrm Impfstoff unn su weider unn su fort.

Isch habb dorschs Telefon geheerd, wie de Schorsch sich omm Kobb gekratzt hott. Ja, unn wo kriehn merr su enn Noochweis her, dess Kättche unn isch?

Isch saach: Dess iss immer noch nitt klar, wer su ebbes mächt unn was dess kossde dut. Also bis doohie: Immer schee de Impfpäss im Seggel hawwe.

De Schorsch hott geschnauft: Also brauch isch koo Smartfon?

Ich habb gegrinsd: Doodeferr nitt, Schorsch, awwer wenn de mol e Selfie mett doim ahle Kobb onn doi Enkel schigge willst, iss e Smartfon gons prackdisch. Schorsch? Schorsch? Der hott oofach uffgeleeschd, der Simbel.

Eiern Honnes